



REPUBLIKA E SHQIPËRISË

**KOMISIONERI PËR TË DREJTËN E INFORMIMIT
DHE MBROJTJEN E TË DHËNAVE PERSONALE
DREJTORIA PËR TË DREJTËN E INFORMIMIT**

Nr. 1260/prot.
4

Tiranë më 10.10.2018

VENDIM

Nr. 50, datë 10.10.2018

PËR

URDHËRIMIN E AUTORITETIT PUBLIK

Në mbështetje të nenit 23 të Kushtetutës së Republikës së Shqipërisë, pikës 3 dhe 5 të nenit 24, të ligjit nr. 119/2014 "Për të drejtën e informimit", shkronjës a) të nenit 31/1 të ligjit nr. 9887 datë 10.03.2008 "Për mbrojtjen e të dhënave personale" i ndryshuar,

KONSTATOVA SE:

Ankuesi, z. ka depozituar pranë Zyrës së Komisionerit për të Drejtën e Informimit dhe Mbrojtjen e të Dhënave Personale (në vijim quajtur "Komisioneri") Formularin e Ankesës nr. 1260 Prot., datë 06.08.2018, me objekt "*Ankim ndaj refuzimit për dhënie informacioni dhe kopje të dokumenteve zyrtare*", kundër Autoritetit Publik "Fondi i Sigurimit të Detyrueshëm të Kujdesit Shëndetësor" (në vijim quajtur "Autoriteti Publik").

Ankuesi në cilësinë e kërkuarit, nëpërmjet kërkesës së datës 02.07.2018 ka kërkuar nga Autoriteti Publik t'i vihet në dispozicion dokumentacioni dhe informacioni i disponueshëm në lidhje me:

- 1. Të dhënat statistikore për të gjitha ambientet apo godinat e marra me qira gjatë 10 viteve të fundit nga Fondi i Sigurimit të Detyrueshëm të Kujdesit Shëndetësor dhe nga gjithë zyrat e degëve rajonale të Fondit të Sigurimit të Detyrueshëm të Kujdesit Shëndetësor në Republikën e Shqipërisë, ku të pasqyrohen godinat, sipërfaqja e tyre, kontratat e qiramarrjes së ambienteve apo godinave private, kohëzgjatja e tyre dhe kostoja mujore e qirasë.*
- 2. Të dhënat statistikore për të gjitha kostot financiare që janë paguar në formë qiraje gjatë 10 viteve të fundit për godinat apo ambientet private që janë marrë me qira për zyrat e Fondit të Sigurimit të Detyrueshëm të Kujdesit Shëndetësor në Republikën e Shqipërisë.*

Lidhur me sa kërkon në kërkesën e sipërcituar, z. _____ pretendon se nuk ka marrë përgjigje nga ana e autoritetit publik dhe për këtë arsye ka bërë ankesë pranë Zyrës së Komisionerit.

Komisioneri, në ndjekje të procedurës për shqyrtimin administrativ të çështjes, si hap paraprak përpara marrjes së vendimit, me shkresën nr. 1266/1 Prot., datë 07.08.2018 ka kërkuar nga Autoriteti Publik rivlerësimin e dhënies së informacionit brenda datës 14.08.2018.

Autoriteti Publik, me anë të shkresës nr. 3757/3 Prot., datë 15.08.2018, administruar pranë Zyrës së Komisionerit me nr. 1266/2 Prot., datë 16.08.2018, ka kërkuar shtyrje të afatit të dhënies së informacionit, deri në fund të muajit Gusht për arsye të kohështirjes së informacionit të kërkuar (10 vjet), si edhe të mungesës së burimeve njerëzore në atë periudhë.

Me pretendimin se është cënuar në të drejtën për informim si dhe pas kalimit të afatit të kërkuar nga Autoriteti Publik, ankuesi ka vijuar ankimin me nr. 1260/1 Prot., datë 20.09.2018 pranë Komisionerit, duke i kërkuar ushtrimin e kompetencave që i njeh ligji për rastet e refuzimit të dhënies së informacionit.

Zyra e Komisionerit, me Urdhrin Nr.241, datë 03.10.2018, vendosi fillimin e hetimit administrativ pranë Autoritetit Publik, me qëllim verifikimin e fakteve dhe rrethanave që mund të jenë bërë pengesë për vënien në dispozicion të informacionit të kërkuar.

Gjatë inspektimit u konstatua se kërkesa e z. _____ është depozituar pranë Autoritetit Publik nëpërmjet shërbimit postar dhe regjistruar me nr. 3294 Prot., datë 04.07.2018. Pas kontaktit me koordinatorin për të drejtën e informimit pranë Autoritetit Publik, u sqarua se kërkesa e z. _____ i ka kaluar për trajtim nga Drejtori i Përgjithshëm, Drejtorit të Drejtorisë Ekonomike, Drejtorit të Drejtorisë Juridike dhe Koordinatorit për të drejtën e informimit pranë këtij të fundit. Për arsye të ngarkesës, kohështirjes së informacionit të kërkuar, si edhe të mungesës së burimeve njerëzore në atë periudhë, Autoriteti Publik, me anë të shkresës nr.3757/3 Prot., datë 15.08.2018, ka kërkuar shtyrje të afatit të dhënies së informacionit, deri në fund të muajit Gusht. Në vijim, është përgatitur përgjigja nga Drejtoria Ekonomike dhe është dorëzuar për firmë pranë Drejtorit të Përgjithshëm me datë 10.09.2018. Pikërisht në këtë periudhë, ndodhi zëvendësimi i menjëhershëm i titullarit të Fondit të Sigurimit të Detyrueshëm të Kujdesit Shëndetësor, gjë që shkaktoi vonesën në kthimin e përgjigjes.

Pas parashtrimit të fakteve u hartua procesverbali i cili u nënshkrua pa vërejtje nga ana e përfaqësuesve të Autoritetit Publik.

Pas konsultimit të legjislacionit përkatës dhe dokumentacionit të administruar, Komisioneri vlerëson se argumentet e parashtruara nga Autoriteti Publik për mos vënien në dispozicion të dokumentacionit nuk qëndrojnë.

Bazuar në nenin 15 të Ligjit për të Drejtën e Informimit, Autoriteti Publik, trajton kërkesën për informim, duke parashtruar informacionin e kërkuar sa më shpejt të jetë e mundur, por jo më vonë se 10 ditë pune nga dita e dorëzimit të saj, përveç rasteve kur ligji i posaçëm parashikon ndryshe. Për sa më sipër, konstatohet se Autoriteti Publik nuk e ka përmbushur detyrimin për të informuar kërkuuesin.

Nga shqyrtimi i çështjes rezulton se informacioni i kërkuar nga z. _____ është i regjistruar pranë Autoritetit Publik dhe si i tillë administrohet prej tij duke përmbushur në këtë mënyrë kërkesat e pikës 2 të nenit 2 të Ligjit nr. 119/2014 "Për të drejtën e informimit", sipas të cilit "*informacion publik*" konsiderohet çdo e dhënë e regjistruar në çfarëdo lloj forme dhe formati, gjatë ushtrimit të funksionit publik pavarësisht nëse është përpiluar ose jo nga Autoriteti Publik".

Ligji për të Drejtën e Informimit ka për qëllim të nxisë përforcimin e integritetit, të transparencës e të përgjegjshmërisë së autoriteteve publike. Si rrjedhojë, duke qenë se informacioni që kërkohet është informacion publik atëherë dhe dhënia e tij është një detyrim ligjor që do të përmbushi kërkesën për informim dhe do të rrisë ndjeshëm transparencën.

Për sa më sipër, nga ana e Autoritetit Publik duhet të procedohet me vënien në dispozicion të informacionit/dokumentacionit të kërkuar.

Bazuar në pikën 3 të nenit 3 të ligjit sipërcituar, "*Çdo person ka të drejtë të njihet me informacionin publik, nëpërmjet dokumentit origjinal ose duke marrë një kopje të tij në formën ose formatin që mundëson akses të plotë në përmbajtjen e dokumentacionit*".

E drejta për informim është një prej të drejtave themelore të njeriut, e parashikuar në nenin 23 të Kushtetutës së Republikës së Shqipërisë. Kjo e drejtë duhet parë e lidhur ngushtë me parimin e transparencës dhe llogaridhënies, si një shtyllë tjetër themelore e shtetit të së drejtës. Funksionimi i tyre do të ishte në interesin e të dy palëve.

Në këto kushte, në lidhje me ankimin e z. _____ ndaj Autoritetit Publik, Komisioneri vlerëson se, duke pasur parasysh sa është parashtruar më sipër, ankimi është bazuar në ligj dhe si i tillë duhet pranuar.

PËR KËTO ARSYE:

Bazuar në shkronjat b) dhe ç) të pikës 5 të nenit 24, nenit 25 të ligjit nr. 119/2014 "Për të drejtën e informimit", shkronjën a) të pikës 1 të nenit 18 të ligjit nr 49/2012 "Për organizimin dhe funksionimin e gjykatave administrative dhe gjykimin e mosmarrëveshjeve administrative", i ndryshuar,

V E N D O S A:

1. Pranimin e ankimit nr. 1260/1 Prot., datë 20.09.2018 të z. _____, kundër Autoritetit Publik "Fondi i Sigurimit të Detyrueshëm të Kujdesit Shëndetësor", me

objekt "Ankim ndaj refuzimit për dhënie informacioni dhe kopje të dokumenteve zyrtare".

2. Urdhërimin e Autoritetit Publik për vënien në dispozicion të dokumentacionit të kërkuar sipas kërkesës për informacion të datës 02.07.2018:
 - Të dhënat statistikore për të gjitha ambientet apo godinat e marra me qira gjatë 10 viteve të fundit nga Fondi i Sigurimit të Detyrueshëm të Kujdesit Shëndetësor dhe nga gjithë zyrat e degëve rajonale të Fondit të Sigurimit të Detyrueshëm të Kujdesit Shëndetësor në Republikën e Shqipërisë, ku të pasqyrohen godinat, sipërfaqja e tyre, kontratat e qiramarrjes së ambienteve apo godinave private, kohëzgjatja e tyre dhe kostoja mujore e qirasë.
 - Të dhënat statistikore për të gjitha kostot financiare që janë paguar në formë qiraje gjatë 10 viteve të fundit për godinat apo ambientet private që janë marrë me qira për zyrat e Fondit të Sigurimit të Detyrueshëm të Kujdesit Shëndetësor në Republikën e Shqipërisë, brenda datës 17.10.2018.
3. Kundër këtij vendimi palët kanë të drejtën e ankimit në Gjykatën Administrative Tiranë, brenda 45 ditëve nga marrja dijeni, sipas nenit 25 të ligjit nr. 119/2014 "Për të drejtën e informimit".
4. Ky vendim u shpall sot në datë 10.10.2018.

KOMISIONERI

Besnik Dervishi

